

# 1 TIMOOTI

## Timootina indaarumamaqoo akarafa.

<sup>1</sup> Oo Timooti anee kumaaraa marianafa anee qini qimaakuara foora mariananoo. Qinee ooqai ani qimamafannana aninna irirafa qufana Yisufinnai quandoona Anutufa faqa narí asauku mundirafa Yisufa faqa maasa asumu maroofa maasa minasaa mundi marunafa mifa qini mara quqagoosa minara asauku mundirafa Yisufa narí ainainianeera maqasaa fasiqa diqigoosa maa pa-piqana qinee Pauroosa ani akara rumamaqeeqa.

<sup>2</sup> Oo Timooti maasa qikoofa Anutufa faqa maasa karaambaiqa asauku mundirafa Yisufa faqa ani dadaaqiaqa, misa nariqa nifauarana ani amiaqa. Misa ani aundura asoarana faqa amiaqa.

*Pauroofa unna amaana ufa qimariasara Timootina aaquqimamaqoo ufafa.*

<sup>3</sup> Ooqai qinee Maseedoonia maaqa maqai fiqa aniara Efeesusa maqusaki mariannee qiafan-nana maqee faqa miqí kai iqa miqoo mariannee qidaqa. Efeesusa maqusaki mariasa akaqausa fuka unna amaana qimari ufana faiqí anaasee qimannimi mariasa mariafaqa minara anee qaoo qianneera miqoo mariannee qidaqa.

<sup>4</sup> Anee maaqi qimasee qaoo qia. Misa narí uriuqa minnisaaqa misa narí nikeeku nikaaku nifaqnausa nifasaasa qimammaree kisaqasaa

fimariana minnisaaqa. Miqi qimaria ufafa ufa rainarana tinoorirana kai uqeeraidanoo sia Anutuna marirafa nirafa maasaki marina dadaaqidanoo. Anutufa maasara maaqoo fuannaanna sia mi manda dapi ufanannai paqurianaura maasa nári irirana Yisunasaa rusiranannai kai fuanna aanna paqurianaura.

<sup>5</sup> Sia fifau mi unnana qimariasara qaoo qiannee qidaqa faiqí anaasee miqooqaraasa Yisunasaa rusirana sia unna qiaqa kuqaa kai qiaqa, kuqaa anoona uqannasaa mundusee fiqa nári nifaaqa qumaarararana siaisa aufadamasee nidaqa nári naunduraki ikairi siaisa nidaqa mi qaaramoo ainainakiqari faiqí aanaaseera nimuqusirana rirafa kambiqaidanoo. <sup>6</sup> Faiqí anaasee akaqausa mi anonna ainainakiqari quandakiqa fifau faafau qira ufa narí qimami narí qimami qianannai nariqa ninaakusamarara kaqi runna fimariafanoo. <sup>7</sup> Mi unna amaanna qimariasaa paasoosamandee nári faqa sia irimaria ainainnara faqa ufara faqa kaqi paasoosamasee kaqi qimannimidaqa kafa náriara Anutuna sandufa qimannimi marunausee qidaqa aaqaidaqa.

<sup>8</sup> Anutuna sandufa Mooseenasaaqari qimannimu ufafa amiqira ainaina maridanoo. Faiqí anaasee mina andeeqasee irifanoo amiqira ainaina mariannoo. <sup>9-10</sup> Maasa oosana oosana sandufara maaqi qimiridaqa. Sia amiqira fasiqa anaaseerau maridau, ufa rukiee mariasara maridanoo Kaamanna ufa rukiee mariasaa faqa Anutuna siaisa faqa Anutuna ufa rukiee mariasaa faqa sia Anutunara irimariasaa maqasaa

ainainara kai irimariasa nári ninausa nikausa kuqa narimariasa faqa faiqí anaasee kuqa nári mariasa faqa faiqí anaasee narinni narinni qummuari mariasa faqa faiqí fannoo aqoonna fasiqa aafeeqara oosana faqa anaasee fannoo aqoonna anaasee aafeeqara oosana faqa faiqi aanaaqi qummuari mariasa faqa unna ufa qimariasa faqa siaasa ufa irimarinaki mafi nári kai raqaseenoo moonara unna ufa qimariasa faqa aiqama anoona ufa rukiee mariasa faqa mi aiqama mandoosanna maraqa nuasara misara kai Anutufa nári sandufa misa qaoo qimaseenoo quqasoofanoo maridanoo. Misa nimaarusira sandufa quqasoofanoo maridanoo, sia mi aaqara oosanauqa maree mariasa kaifau nimaarusidanoofau oosana oosana ainaina Anutuna mapukira ufa rukiee mariasa faqa nimaarusidanoo.

<sup>11</sup> Mee Anutuna mapukira ufa qunnana mifa maasa Anutuna amiqirana mina areenarana kooroo idanoo. Mina amiqira fasaasa ufa amana kai mi ufafa maridanoo. Mi fasaasa ufana Anutufa qinisaa quqasee anee Timooti qimannimiannee qu ufafa maridanoo.

*Pauroofa Yisunara nári mandoosanara afauoonara dufi dufi qu ufafa.*

<sup>12</sup> Qinee mi saikanaki nimariafananoo maasa karaambaiqa asauku mundirafa qini ainainirana amana kai qimunara dufi dufi qidaqa. Mifa qiniara mi ainainirana amanaikammi ifoo qimaseenoo mara quqaqaisa maridaqa minara faqa maasa karaambaiqa asauku mundirana Yisunara dufi dufi qidaqa.

13-14 Ooqai indaaru qinee Pauroosa Yisunara mandufa qimariafanausa mina ainainimaru fasiqausa naru nifaqaa iqa niniaafanausa Yisuna faqa aquraraafanausa maridaqa. Anutufa qiniara sia Yisunara iridanoo fee qimasee sia nari mandoosanara iridanoo fee qimaseenoo sia qini darinoo, qini qifauamaseenoo nari afaarirana qinisaa nammariara foora adiaseenoo minasaa qeeqa irirana Yisunasaa rusirana faqa faiqi aanaaseera qimuqusirana faqa qiminau. Maasa aiqamausa asauku mundirana Yisunaki keeqee mariasa mi nimimaria ainainnaqanda Yisunasaa irirana rusirana faqa faiqi aanaaseera qimuqusirana faqa mi qaara ainainnaqanda qiminau.

15-16 Maa ufana anoona ufa maridanoo qumaree iri maria ufafa maridanoo asauku mundirafa Yisufa manda oosana maree mariasa asumu maraane qimasee quminau. Qinee Pauroosa mi mandoosanna uriqararaura mariafananoo Anutufa sia qini darinoo qifauanau. Asauku mundirafa Yisufa nari kasoomambi qini qifiqaranara firaana firaqoo koorooianifeera mandoosana uriqararaura qini qifauanau. Miqimaseenoo Yisufa qini mareeqeenoo akooqoo quqasoofaqa naaru kasooqaqee Yisuna mandaaqasee naaru marirana maree mariasa qini kikiqususaidanoo qini mandoosana uriqaranoo maruna ririmma qifauamaseenoo minni qisanau. Innindi oorudupinoo maridanoo mina mandaaqasaifanoo kaqi inni faqa maraanauree qinuu. Qinee minara irisee amooqira ufa maaqi

qimasee qianauro.

<sup>17</sup> Naaru naaru mari karaambaiqafa sia kuquaninafa maasa sia mina qafee marunafa moodaa Anutufa sia moo fannoo marifa uriqararana faqa areenarana faqa naaru naaru minaindi mariannoo.

<sup>18</sup> Oo Timooti anee qini qimaakuara foora marianafa. Qinee maa ufana anisaa quqaidaqa. Ooqai tamummaqara fasiqauqa qimaqoofa ani qimamira ufa mi mau fidanoo. Ani ainainirafa andeeqara rakiara foora imariannana qini ufa fannoo ani duru feefara foora inoo mariannoo.

<sup>19</sup> Amiqira rakirana rakidana ani Yisuna saqarikirana uaqeeia, afaaqa qumaara rarana siaina mina faqa uaqeeia. Faiqí akaqausa nári naaqoo irirafa qimannimifaqa andeeqasee fidaqa misa nári Yisuna saqarikira irirana munu furufarammaseeqa kurididaqa. <sup>20</sup> Qaara fasiqa Qimeenaeusafa faqa Areekisandeerafa faqa miqandaqara miqi marufaqa qinee mareeqee Sadanna asaukuki quqaafanaqa misa Anutunara mandufa qirana taikaaqeera quqaqiafana.

## 2

*Pauroofa Yisuna ufara suqinnanaki maaqi qimasee innaaru qiaqee qinau.*

<sup>1-2</sup> Maa ainainna naaree ani aamuaqimamisaanana anee faqa Yisuna ufara suqimarias faqa suqidaga innaaru qidaga maaqimasee innaaru qiaqa. Maa maqanasaa faiqí aanaaseesaa rakisinnimaqee marisara misa amiqimasee rakisinnimaqaaqeera innaaru qiaqa. Innee kaqiqeesa reendenamasee

asooaranaki mariaqeera misara innaaruqiaqa. Anutuna ufamau fidaqa andeeqara mariranaki mariaqeera aupuraranaki sia mariaqeera misara innaaruqiaqa, innee maqee maqee aiqama fasiqauqara faqa maa maqanasaa firaaqoo uriqararausa faqa kaamanna uriqararausara faqa Anutuna afusaa Anutufa misa dadaaqianifeera innaaruna qiaqa. Misara faqa dufi dufi qirana qiaqeera qidaqa. <sup>3-4</sup> Misara innaaru qirafa amiqira oosana maridanoo Anutufa maasa asumu maree marifa minara aididanoo. Mifa aiqama fasiqa anaasee asumu mariranaki ani mariaqeera qidanoo anoona ufamau fuaqeera qidanoo misara innaaruqira oosannara Anutufa aididanoo.

<sup>5-6</sup> Moodaa Anutufa kai maridanoo moodaa fannoo kai nari Anutuna faqa faiqi anaasee faqa mara moodaanakikamma nimaqaidanoo. Mi fasiqafa Anutuna asauku mundirafa Yisufa maridanoo faiqi anaasee oonu kafa marasee nariki quqaanifeera nari afaqa kuqiranaki quqanau. Maasa mina qafamaseeqa maaqi qidaqa. Oo Anutuna nari aukwana maridanoo. Oo mifa kuqaa aiqama fasiqa aanaaseera asumu mariranaki mariaqeera miqidanoo. <sup>7</sup> Minara faqa qini Pauroosa qeeqa maqusaindari diqiqamasoofaqa qinee aanaamuru aiqama uqannifiqaidaqa Yisunasaa irirana rusirana anoona ufa faqa qimannimidaqa. Qinee sia unna qidaqa anoona ufa kai qimannimidaqa.

<sup>8</sup> Yisuna ufara suqimarianaki faiqiara qinee maaqi qimasee naamuaqidaqa. Aiqamai maria fasiqausa aanooqirana siaina, ufa rainarana

siaina, nári nisauku anukarause uqeerasee innaaru qimariasa nári marirana nári nirana minauqara Anutunaindi fee qiaqeera, aiqama fasiqara miqi mariasee innaaru qiaqeera qidaqa.

<sup>9</sup> Anaaseera qinee maaqi qidaqa. Aiqama nári nifaaqai mari siara qamunnana amiqimasee nári nifaaqa aanaamususee irirana faqaa-saikamambi mariaqee qidaqa. Sia kaaqa firaaqoo oosana oosana ainaina nifaaqa auquuqa. <sup>10</sup> Niqoonausa dadaaqirafa mifa inni nifaaqa auqirafara foora mariani. Anutuna ufa irimaria anaaseesa andeeqara oosana miqiminoo maridanoo. <sup>11</sup> Yisuna ufara suqimaria maqanaki keeqaifaqa anaasee ufa siaina reendeenamandee Anutuna ufa iriaqa. <sup>12</sup> Yisuna ufara suqimaria maqanaki aanaaseeuqa sia kikiqa mafiqá Anutuna ufa qimannimiaqa. Misa sia faiqí urinaaqaramafi mariaqa qinee mina qaoo qidaqa misa ufa siinausa mariaqee qidaqa Yisuna ufara suqimaria maqanaki miqiaqee qidaqa. <sup>13</sup> Anutufa Adamana naaree auquseenoo doo mina inaaqianna Eeuana auqinau. <sup>14</sup> Sadannafa sia faiqí akaruqinau, anaasee kai akaru qima-soofanoo Anutuna ufa rukianau. <sup>15</sup> Doo maqee Anutufa sia aiqama aanaaseeuqa mina akiaqara naru taikaannoo faiqi maqaranasaa marifaranoo. Misa nári nifaaqa amiqimmandee aanaamususee maridaqa Yisunasaa irirana rusiseeqa mariaqa faiqí aanaaseera amuqusamasee mariaqa qikairi siaisa anukarause mariaqa. Miqidaqa noori kandamasee maridaqa kaqi marifaranoo.

### 3

*Pauroofa Yisuna ufara suqimarinausasaa rakisirausara naakapamaqoofa.*

<sup>1</sup> Maa ufana anoona ufa kai qinee Pauroosa qimannimiana. Faiqí moo fannoo Yisuna ufara suqimariasasaa rakisiraree qimarifa amiqira ainainammiannoo.

<sup>2</sup> Yisuna ufara suqimariasasaa rakisimari papatarafa narí nirana marirana sia aaqarafa mariannoo andeeqarafa marida andeeqasee rakisianoo. Miqimarinna fasiqafa moodaa anaasee faqaafa kai mariannoo. Mifa oori runusee marifa mariannoo. Narí aakiranara iri marifa mariannoo. Narí qumiasana aina faqa marirana faqa andeeqasee quqemarifa. Mi fasiqafa Yisuna ufara suqimariasasaa rakisiranaiki mari fasiqafa aanaamuru maqee maqee mina maqusaki aniraafanoo amiqi amiqidanoo nifiqa narí maaqaki quqasaida narana firidanoo. Mi fasiqafa Anutuna akarakinaa ufa andeeqasee qimannimi marifa mi oosanausa maree marifa Yisuna ufara suqimariasasaa rakisirafa amanaikiannoo. <sup>3</sup> Mifa sia nammari namasee furufaridanoo marifa faiqí anaasee sia narí marifa mariannoo. Mifa fifira oosanara reendeenira oosanara kai rimarifa mariannoo. Mi fasiqafa sia kaaqa munnimara rimari fasiqafa mariannoo.

<sup>4</sup> Mifa narí faiqí aanaaseera amiqimasee rakisinnimaqee marifa maridanoo. Mi fasiqafa narí faiqi namuara qimannimifaqa eedoo qimasee reendeenamandee auqee marinausa mariaqa.

<sup>5</sup> Mi fasiqafa narí faiqí anaasee sia amiqimasee



rakisinoo naqimaseenoo fee Yisuna ufara suqimaria maqanaki keeqee mariasasaa rakisiannoo fee.

<sup>6</sup> Yisuna ufara suqimariasasaa rakisiranaiki mari fasiqafa sia fukasaa Yisunasaa irirana rusimarina mara quqaa. Miqimari fasiqafa dauni narí oori uqeerasee narí afaaqa mara maree uridanoo amooqinoo dauni aaqaranaki aqufuandoora. Ooqai Sadannafa innaarunai miqimarunara Anutufa atekaanau. Maa fuka fasiqafa Yisuna mandaaqarana miqi kai inoo Anutufa ateekaandooraa. <sup>7</sup> Yisuna ufara suqimariasasaa rakisiranaiki mari fasiqanara Yisuna ufara sia irimariasasaa faqa minara amiqira fasiqee qimariafa mariannoo. Miqi qimaria fasiqafa sia Sadannana namufaqa moodaa madikaki aqufinoo asauruanoo. Doo Yisuna ufara suqimariasasaa rakisimaria fasiqausa oosana doo miqiminoo mariani.

*Pauroofa amaanufasaa rakisimarusa dadaaqimariasara qinuu.*

<sup>8</sup> Doo qinee Pauroosa amaana maqasaa rakisirausara qimasee doo maqee misa ooreeqara dadaaqirausara qianaura. Amaanufasaa rakisirausa dadaaqimariasara misa marirana nira andeeqasee noori runusee mariasasaa mariaga. Misa faqa sia nammari namasee furufariaga. Misa faqa sia kaaqa ainainara rimarinausa mariaqa. <sup>9</sup> Misa akarakinaa Anutuna ufa qumareeqa mi mau fidaqa sia nifaaqa umaararaani-feera aufadaqa mariaqeera mariaqa.

<sup>10</sup> Dadaaqimaria fasiqausa sia kaqi mareeqee dadaaqiranaki quqarafa mariaqa. Misa

amanamasee qafeenana kai mareeqee dadaaqira saikaki quqaa. <sup>11</sup> Dadaaqi maria fasiqausa ninaaqmaaka faqa marirana nirana andeeqasee maridaqa sia munuqi miniqi qimariasa marifaranoo. Mi anaaseesa noori runusee maridaqa anoona ufa kai qimariasa mariaqa. <sup>12</sup> Yisuna ufara suqimariasa amaanufasaa rakisirausa dadaaqimarifa moodaa anaasee faqaafa mariani nari faiqi anaasee amiqimmandee rakisi marifa mi saikanaki mariani. <sup>13</sup> Amiqimasee kisaagasaa papatara saika auqaqa fimariasa aiqamausa nifusaa uriqararana maraidaqa miqidaqa, misa asauku mundirana Yisunasaa irirana rusirana atukarasee mapukirana maraidaqa.

*Anutuna kukeeqara ufa anoona Yisufa firaafa maridanoo.*

<sup>14</sup> Qinee Pauroosa maa papiqana akara ridaqa qusasaa inni oonu nindafararee qidaqa. <sup>15</sup> Moo ainaina fannoo qini rafaqafimarifaqa maridaqa maa papiqanakinaafa inni Anutuna aiku asaukuki nirana marirana naamuaqiannoo. Anutuna ufara suqiranaki keeqee mariasa misa Anutuna amaana maqara foora maridaqa. Anutuna anoona ufa faakana maridaqa.

<sup>16</sup> Maasa Yisuna ufa irirana anoona ooqaindari kukeeqara ufa marifa Yisufa idaaqirafa firaafa maridanoo, sia amana moo fannoo minara qaoo qirafa.

Yisufa maqasaa fasiqa nifiri kammafinoo koorooinau. Anutuna maraquna fannoo minara andeeqarafa maridanoo fee qinau. Qangiroouqa

mina qafaqau. Faiqí moomoosa maaqanna maaqanna minara qimannimiqau. Maa maqa maaqanaki marusa minara kuqaammifoo qiqau. Anutufa mina mareegeenoo innaarunai quqaqoofanoo maridanoo.

## 4

*Pauroofa kasooqaqee aaqarufa kambiqaanoo fee qimaqoo ufafa.*

<sup>1</sup> Anutuna kaaqa andeeqara maraquna fannoo kasooqaqee kambiqaaninna aukuanara maaqi qimasee akooqoo fíraaqoo kooroodanoo. Mi kamuqoo akaqausa Yisunasaa irirana rusiranasaqari rakeemaki unna qira afaanna ufa irifaranoo akaqausa afaanna uqanna ufamau fifaranoo. <sup>2</sup> Unna qimaria fasiqausa kai mi unna ufausa faiqí anaasee Yisuna ufana suqimariasaa qimannimiqa nifaranoo. Mi unna qira fasiqausa nári mandoosanara sia qumaara nari-danoo nariqa naaqoo irirana doo ida fannoo nari-noora foora inoo marifaqa sia ummaara narifaqa nisaurifara.

<sup>3</sup> Miqi maria fasiqausa unna qimasee anaasee mararanara mandoosanee qimasee akaqa naranara manda narana sia naaqee qifaranoo. Anutufa mi oosana oosana narannara faiqí anaasee naaqeera auqu quqaqoofa maridanoo. Mina ufa irimariasaa mina anoona irimariasaa dufi dufi qimasee naaqeera quqaqoofa. <sup>4</sup> Anutuna aiqama auqu quqaqoo ainainna aiqama amiqirafa kai maridanoo sia amana moo naranara mandaikira fee qianaara. Aiqama ainaina innaaru qimasee dufi dufi qimasee naaqa. <sup>5</sup> Anutuna ufa

faqa maasa innaaru qirana faqa mi naranna anukamasainanoo amiqinoo mariannoo, Anut-ufa amiqiranee qiannoo.

*Pauroofa Timootina aakapeenoo andeeqasee fuanee qu ufafa.*

<sup>6</sup> Oo Timooti anee asaku mundirafa Yisuna amiqira ainainira faiqi maridana mina ufa irimariasa ani akaqaafasaa uqa qini maa ufausa qimannimia. Yisunasaa mundira ufa faqa mina anoona ufa faqa ani ooqai mi ufanasaa fidana innooqana marianafa mariananoo. Miqidana qini maa ufausa aneenna akaqaafasaa uqa qimannimia.

<sup>7</sup> Fifau uri qirana maa maqanasaaqaraa uriuqaki sia minaki aqufua nianai tatiaaqa, fifau ufa. Anee Anutuna dadaaqidana rakiranakiara foora mariananoo minara maqee maqee aununu rakisiara foommasee amanamasee qafamasee afeekaikia. <sup>8</sup> Maa maqanasaaqaraa amudaani maqee maqee afeekaikamasee amanamasee qafarana kaqikaqoo maa maaqanasaa kai amana maridanoo aneenna aundurakinaana maqee maqee afeekaikamasee amanamasee qafarana firaqoo amiqirafa maridanoo, mifa maqee marirana faqa naaru marirana faqa amidanoo. <sup>9</sup> Mi ufafa anoona ufa maridanoo minasaa mundimariafa maridanoo. <sup>10</sup> Minara kai maasa kadaapirida nimudaanai qidaqa. Maasa qiqa qimuqusakinaa irirafa kaqi marira Anutunasaa mafi munduseeqa. Mifa aiqama fasiqa anaasee asumu maree marifa maridanoo, mina ufasaa rusimariasa kuqaa misa asumu maree marifa maridanoo.

<sup>11</sup> Mi ufausa amiqimasee faiqí anaasee naa-muaqia. <sup>12</sup> Oo Timooti anee kumaaraa mari-ananoo minara faiqí anaasee irisee sia ani ufa irifooro maa ufana ani qimamidaqa. Aneenna ufa faqa aneenna nirana faqa aneenna faiqí aanaaseera amuqusirana faqa aneenna Yisuna saqarikirana faqa aneenna andeeqasee marirana faqa amiqimasee andeeqasee akooqoo marinaqa qafeeqa faiqí anaasee Yisuna ufa irimariasa ani afaqaidaqa ani aanna raqeera. <sup>13</sup> Oo Timooti qinee anee ianannai kasooqaqee fua-naura. Anee qini qifeesidana maqee maqee faiqí anaasee aiqamausa nifusaa Anutuna akarakinaa ufa asaana rumasee mina oosana koorooman-nimisee mi mau fuagee qimasee fuki faaki qia.

<sup>14-15</sup> Ooqai Yisuna ufara suqimarusasaa rakisirs-  
 ausa ani sindimeera foora quqamaqeeqa nisauku  
 ani afaaqai quqasee ani afaaqooqa qiqa Anutuna  
 maraquna fannoo afeeka moo amuna afeekaika-  
 masee amanamasee qafamasainaqa aiqamausa  
 aniki doo maridanoo fee qiaqa. <sup>16</sup> Aneenna  
 nirana mariranasaa faqa aneenna faiqí anaasee  
 ufa qimannimiranasaa faqa rakisia. Qinee qi-  
 mamunna ufamau andeeqasee finana ani nirafa  
 marirafa andeeqasee marinana anee aneenna  
 faqa ani ufa irimariasa faqa asumu mareennara-  
 noo.

## 5

*Pauroofa Timootina aakapeenoo faiqí anaasee  
 firaasa adeedaana anaaseeuqa faqa andeeqan-  
 nisaannee qu ufafa.*

1-2 Oo Timooti anee Yisuna ufa irimariasa faqa maridana sia faiqí firaasa ufa arua. Faiqí firaasa ani akausara foora marifana reendeenamandee ufa qimannimia. Kumaaraauqa faqa aneenna akaqaafasaara foora kai ufa qimannimia anaasee firaasa faqa aneenna anasara foora amiqimasee kai ufa qimannimia. Maanaaqa aanaaseeuqa faqa aneenna asooqmaakara foora andeeqaseenana kai misa faqa ufa qia.

3 Adeedaana aanaaseeuqa misasaa rakisi mariasa sia marifana anee Yisuna ufara suqimariasa qimanniminaqa miqira adeedaana uqasaa andeeqara rakisira rakisinnimaqaqa. 4 Adeedaana aanaaseeuqa marifanoo nári ninaiqimara faqa faiqi namufaqa marifana anee qimanniminaqa misa quandafi nári ninausa nitaatoosamara amiqimmandee rakisinnimaqaqa. Anee miqidana maana faqa qimannimia, misa Anutuna ufamau fidaqa indaaruaa ainaina mifa mariannoo. Misasaa dadaaqamannisaidaqa nári ninaukoo kadaapi akiaqara nimimariafanoo. Anutufa faqa mi oosannara aqaara raidanoo. 5 Adeedaana anaasee moo fannoo maridanoo minasaa rakisirafa moo fannoo sia marifa mifa kaaqa adeedaana uqanna maridanoo. Miqira adeedaana narí irirafa Anutunasaa mundirafa maridanoo eendaki faasaana Anutunara dufi dufi qidanoo maridanoo minara kai dadaaqiannee qidanoo innaaru qidanoo. 6 Adeedaana aanaaseeuqa oosana moo aaqaidaqa maridaqa nariqa nidimari ainainnara kai qiqa nuasauqa maridaqa misa

doo kuqiqa maridaqa miqiqa nidaqa. <sup>7</sup> Anee mi adeedaana anaaseesara qimanniminaqa andeeqasee mariaqa munuqi miniqi qiqani foora.

<sup>8</sup> Mi ufana aiqamausa qimannimia. Maa ufana faqa qimannimia. Moo fannoo Yisuna ufa iri-marifa narí aiku asauku faqa narí afaaqasaa aiku asauku faqa narana faqa qamunnaina faqa sia rakisinoosia dadaaqinannai narí miqinnannai Yisufa saqarikirana narí ateekeenoo aamina fasiqa mandoosana finnaaqaramasee mareenoo miqidanoo.

<sup>9</sup> Oo Timooti ani Yisuna ufara suqimariasasaa rakisirausa mariasa maridana adeedaana anaasee asooqauqa misa náriara naaduma aanaaseesaa rakisiranaikiqa mariaqa. Sia kaqiqee adeedaanauqa mi saikanaki mara quqaa, qaara moo fasiqa niku nisauku taikasee aukwana (60) maraqaasa adeedaanaikida asooqagee mariasa kai mi saikanaki quqasaina maria. Moodaa fasiqasaa amundoo adeedaanafa kai minaki mariani. <sup>10</sup> Mi anaaseefa ooqai afaari marufa marinnana mifa kai minaki mariani narí faiqi namu amiqimasee firimaru aanaaseefa marufa mifa kai mariani, aanaamuru dapi aanaamuru amiqimmandee rakisimarufa faqa Anutuna ufa maqusa maqusa nida qimannimimarusu faqa narana maqa nimimarusu oosana oosana mandainainaki aqufimarusu dadaaqimarufa, oosana oosana amiqira ainaina eedoo qimasaida auqee marufa miqi maru anaasee asooqausa kai rakisirausaikiqa.

(Mi asooqa adeedaanausa saika Timootina aukwana maaqimminoo marinau. Misa fuka anaasee nari nifaaqmaaka faiqi namu rakisiaqeera gimannimidaga naakapee mariqau. Aagamaki kaqirunna fusa andeeqeeseenoo Anutuna aanai ubeekee mariqau. Mandainainaki aqufusa andeeqasee Anutuna ufa naakapee mariqau.)

<sup>11</sup> Oo Timooti sia kumaaraa adeedaana anaasee maramaree anaasee rakisiranaikia. Kumaaraa anaasee kaifaa faiqiara riqa asauku mundirana saika nimina minnisee foora. <sup>12</sup> Misa asauku mundirana saikaki marianauree qima afeekaikamasoona ateekeefoora. <sup>13</sup> Kumaaraa adeedaana anaasee moomoo suanisaa maaqaki-aqa fifau nimariafanoo ainainira aukwana ainnaaqaree marisa mariafanoo. Misa miqiqa nidaqa manda uriqarara irirana marasee unnufa munuqi miniqi qiqa nidaqa sia qiaqaa ufa qiqa nidaqa. <sup>14</sup> Oo Timooti qinee Pauroosa kumaaraa adeedaana aanaaseera maaqi qidaqa, misa andeeqasee mariaqeera. Misa kaifaa moo fasiqa marasee faiqi minasaa maqasee nariqa faiqisaa rakisida andeeqasee mariaqa. Misa miqi marifanoo maasa namuqaa Yisuna ufara nikooqee marisa maasaki randasee sia mandoosana paqurimasee mandufa uqeeraaqa. <sup>15</sup> Akaqa adeedaana aanaaseeuqa Anutuna ufakiqari rakeemaki Sadannana afaqee doo fia.

<sup>16-18</sup> Yisuna ufara suqimariasa misa rakisirausa akaqa adeedaana anaasee naunannaasa siaisasa rakisifaranoo, akaqa adeedaana aanaaseera naunannaasa faqaasasaa sia



rakisiraree qidaqa. Mi adeedaanausa nári naunannaasamara nifiqa quqasee rakisifaranoo. Miqifanoo Yisuna ufa suqimariasasaa rakisimaria rakisirausa sia mi umaarana maraaqeera.

Doo adeedaana anaasee ufa taikasee kaifaa Yisuna ufara suqimariasara qianauro. Anutuna tamummaqara fasiqa ooqai marusa akaraki ainaini mariasara qidanoo purimakau kikiqusidanoo maaqi qidanoo.

Innee inneeqa purimakau mara maree raisa adi fooqaana nári aikunnai rafarimarinaqa sia naani fee qimasee oori aanaamususaifanoo kaqi nuannoo, innee sia miqiaqa akaqana naidanoo afaaqa اساسimarinanoo rafariani fee qimariqau.

Mi tamummaqara fasiqausa akara minara kafa maaqi qidanoo.

Ainaini mari fasiqafa nári ainainimarina akiqara feefauru maraannoo fee qidanoo.

Timooti Yisuna ufara suqimaria maqanaki keeqe mariasa miqi kai iaqeera qidaqa.

Yisuna ufara suqimariasasaa rakisirausa amiqimasee Anutuna saika uqeeree mariasa Anutuna ufa kadaapi rumasee asaana rumasee fuki faaki imariasasaa Yisuna ufara suqimariasasaa sia amana kai feefauru nimia fiqaramasee aabaara faqa nimia.

<sup>19</sup> Faiqí moo fannoo Yisuna ufara suqimariasasaa rakisiranara anireenoo mi rakisiranara aqaqidanoommifoo qinaqa sia mi moodaa fasiqana ufa iriaqa, nariara qidaqinoo. Faiqí qaraqanda fee qaaramoo fee aniree minara

qifaqa mina irisee andeeqaaqa. <sup>20</sup> Yisuna ufara suqimaria maqanaki keeqee marifa manda oosana marinaqa aiqamausa nifusaa minara qaoo qidaqa ufa qiaqa. Miqimasaifaqa aiqamausa rufiasee sia miqifaranoo.

<sup>21</sup> Oo Timooti qinee Pauroosa Anutuna faqa asauku mundirana faqa naaquqara qangiroouqa faqa misauqa nifusaa qinee doori kandamaseeqa ufa ani qimamianaura. Qinee maqee maa pa-piqanakinaa ufa qimamunnana amiqimmandee mi mau kai fidana Yisuna ufara suqimari-asasaa rakirausa nariqa saika amanakai feefauru nimisee andeeqasee nári aaqarana aiqamausa nifusaa koorooia. Sia moonara qiqaondifee qimasee mina aaqarana kukeeqaisaa, sia moonara aamoondi fee qimasee minaindi akooroo maisa. Aiqama misoo maasoo moodaanaki kammasee rakisinnimaqaa.

<sup>22</sup> Anee sia dauni faiqí moo mareeqee Yisuna ufara suqimariasasaa rakisira saikaki quqasee sindimeera foora quqamaqaa. Anee sia moosa mandainainaki aqufua, aninna marirafa aninna afaaqa anukarafa kai mariani.

<sup>23</sup> Timooti anee aranandaki maqee maqee aurimariananoo qinee minara irisee ani qimamidaqa, anee nammari uqanna kai maqee maqee neemariananoo anee sia mina kai naa, maasa maqee maqee neemarunnana uainna nammarina reendeenimarina mina kaqikaagoo nama-sainanoo aurirafa taikaani.

<sup>24</sup> Faiqí akaqausa misa mandainaina fannoo aiqamausa nifusaa akooqoo maridanoo. Miqira mandoosana fannoo nári nifusaa akooqoo misa

rarisameeqeenoo mandainainaki ququaidanoo. Faiqí akaqausa mandoosana sia dauni qafeefara kasooqagee akooqoo kambiqainaga qafeefaranoo. <sup>25</sup> Miqi kai inoo amiqira oosana fannoo aiqamausa faiqí nifusaa akooqoo maridanoo. Kukeeqara amiqira oosana faqa sia kisaqasaa kukeeqanoo mariannoo kasooqagee mifa faqa akooqoo mariannoo.

## 6

<sup>1</sup> Faiqí moo fannoo Anutuna auquara faqa maasa naamuaqira ufara faqa mandainainee qifoora maa ufana ani qimamianana anee Yisuna ufara suqimaria maqanaki keeqee marisa qimannimia. Ainainafaqaasa maa maqanasaa feefauruaree qimasaida ainaini mariasa anee maaqi qimasee misa naamuaqia, misa aiqama amiqimasee naaquqama nimaqainaga nári rakisirausa ainainamannimaqaaqa. <sup>2</sup> Akaqausa ainainafaqaasa misa faqa Yisuna ufa iri mariasa mariafaqa innee misa ainainira faiqi mariasa sia misara faqa moodaa irirana maree marunausee qimasee mandufa nimiaqa. Innee minara iriseeqa andeeqasee fiqaramasee misa ainainamannisaqa. Innee misasaaqaraa narana qamunnaina maree mariafanoo misara faqa Yisuna ufa irimariasee qimasee maasa misara didimariasee qimasee amiqimasee misa ainainamannisaqa. Oo Timooti anee mi ufausa Yisuna ufara suqimaria maqanaki keeqee mariasa naamuaqimasee fuki faaki qia.

*Pauroofa unna amaanufa qimariasara aaquqi-mannimaqoo ufafa.*

<sup>3</sup> Faiqí moo fannoo maa qinee qunna ufana moo mau kaqirunna fidanoo karaambaiqa asauku mundirana Yisuna anoona ufara qaoo qidanoo Anutuna mapukira ufa siaifa maridanoo kaqirunna ubeekaidanoo, miqi qimari fasiqafa sia moo ainaina qafaidanoo kaqi narí afaaqa kai amooqidanoo miqidanoo. <sup>4</sup> Miqi qimari fasiqafa narí manda iriranana kaaqa kaqikaa ufa oosana oosana ufara fifau rainaidanoo tinoo taanoo ridanoo. Miqira oosana fannoo faiqí aanaaseekina nariara nariara rairaiqirafa uqeeraidanoo ufa rukiarana faqa naraqí naraqira ufa faqa nariara nariara mandirirana irimariana faqa maqee maqee tinoori maria ufa rainee mariana faqa uqeeraidanoo. <sup>5</sup> Faiqí akaqausa aaqee mariasa nári nifaurunnoo unna qidaqa. Misa Anutuna ufamau fidaqa firaa munnimma aina maa maqanasaa marararee qimariasaa. Miqi qimariasaa anoona ufa siaisa, irirafa taikaransa mi ufana qidaqa.

<sup>6</sup> Doo kuqaa Anutuna ufa fannoo faiqí ainaina faqaasara foora mannisaidanoo. Faiqí moo fannoo kaiqeefa Anutuna ufa maree marifa quandaki narí maqee maree mari ainainnara doo qini qimana fee qimari fasiqafa ainainafaqaa fara foora maridanoo. Miqi qimarunara Anutuna ufa fannoo ainainafaqaa faikammamaqeera foora idanoo. <sup>7</sup> Maasa maa maqa maaqanaki faiqi aanaaqisaa nanee maree aniqiafana kaqi samu aniqiafana. Maasa maa maqa maaqanasaaqari

fiqa nanee maree fuanauree, kaqi samumbua-naura. <sup>8</sup> Maasa qamunna faqa narana faqa maasa qimana kai doo maridanoo, doo fee qimasee nifaaqa quqaaqa.

<sup>9</sup> Moomoo ainaina munnimmara randeemari-asa manda nimaniranaki aqufidaqa. Nári moomoo ainainara munnimmara rimariafa nariqa furufariranara nidimarifa mifa mareeqeenoo nári ufaanaki nári naridaqa. <sup>10</sup> Munnimmara rimariafa mandainaina oosana oosana mandainaina oosana areemarifa maridanoo. Akaqausa ooqai Anutuna ufa irimarusa munnimmara ridaqa Yisuna ufa minnisee nariqa ummaara oosana oosana marasaafanoo mi ummaarafa nári nimuqusa radamidanoo.

*Pauroofa Timootinara amudaanai qimasee andeeqaramau fuannee qu ufafa.*

<sup>11</sup> Oo Timooti anee Anutuna ufa irimarianafa mariananoo, anee munnimma ainainara randee maria iriranamau fimariasara faqa mi manda ainainausara faqa eerairiaqa. Innee nimudaanai qimasee andeeqaranara faqa Anutufara foora irirana faqa Yisunasaa mundirana faqa faiqí aanaaseera nimuqusirana faqa kisaqasaa Anutuna aanara afeekaikirana faqa faiqí anaasee ireeda reendeenamandee kai qimannimirana faqa mi ainainausara nimudaanai qimasee maraaqa. <sup>12</sup> Timooti anee Yisuna ufamau fidana narí amani narí amaniara foora amudaanai qimasee rakiranakiara foora urinaaqareenana naaru naaru marirana marasainanoo anindi mariani, mi andeeqara marira niranara Anutufa

ani aarameeqee minaki quqeenoo. Ooqai anee Yisunasaa mundufunafa anee moomoosa nifusaa amiqimmandee Yisunara kooroounafa mariananoo mikari Anutufa mi amanirana ani amufa mariananoo.

<sup>13-14</sup> Oo Timooti aiqama ainaina aidoo nimirarina Anutuna afusaa faqa, Piratoona oorisa kooroounafa asaku mundirana Yisuna afusaa faqa qinee aaquqimasee qimamidaqa. Yisuna ufa asaana rumaseenana aiqama eedoo qimasee maraa, mi mau finana ani nirafa marirafa anukarafa sia aaqarafa mariani. Miqi kai ina fifi inana karaambaiqa Yisufa nari qumira aukwana paquria. <sup>15</sup> Anutufa amiqirafa moodaa rakisirafa aiqama uriqararawsa urinaaqararafa aiqama karaambaiqauqa karaambaiqa mifa nari kai irisee andeeqara aukuanee qimaseenoo mi aukuanna kai Yisuna aqiqainanoo mai kafa kooroomannimaqaannoo. <sup>16</sup> Anutufa mifa kai sia faiqi undee irafa aaduma marifa, mifa kai sia faiqi amana qafaaqairaa kaaqa qaranaki marifa, sia moo fannoo mina qafaida sia moo fannoo amana qafaannoo. Mina auqu uqeerarana faqa naaru naaru afeeka marirana faqa minaindi kai maridanoo. Kuqaa.

<sup>17</sup> Oo Timooti anee ainainafaqaasa maaqi qimasee qimannimia. Innee ainainafaqaasa sia inneeqa nifaaqa nimooqiaqa. Sia innee taikemaria munnimmanasaa inneeqa irirana munduaqa. Inni Anutunasaa kai inneeqa irirana munduaqa. Mifa aiqama ainaina afaaramasee maasa qiqaara raanifee ainaina qimimarinasaa kai inneeqa irirana munduaqa.

<sup>18</sup> Oo Timooti anee ainainafaqaasa mi ufana qimannimisee maa ufana faqa qimannimia. Sia moomoo munnimma ainaina mararara kai iri-aqa. Innee faiqi anaasee dadaaqa mi amiqira dadaaqirana dadaaqa mi dadaaqirana nimimariananaki aniki ainaina moomora foora mariannoo. Innee afaariaqa inneeqa ainaina naida nimiaqa. <sup>19</sup> Innee miqiga moomoo innaarunai qumiasana moomoo suqusee marasee naaru kambiqainna aukwana inni faakanaikianoo. Miqoo innee kuqaa amiqira marirana marasee marifaranoo.

<sup>20</sup> Oo Timooti qinee moomoo fasiqa anaasee ani asaukuki quqasaanana anee amiqimasee afapita qumaraa. Dapi ufa Anutuna andeeqarufa sia minaki mari ufafa furufarira ufa raiqara ufa faqa akaqausa moo aaqara ufara unna qimasee irirana faqaasa ufa fee qidaqa mi ufausara aiqama anee faqa misa faqa eerairiaqa. <sup>21</sup> Akaqausa mi unna irirana faqaasa ufara doo iridaqee qinausa Yisuna ufasaa fimariaqooqari quqasee auiaidaqa. Doo.

Anutuna afaarirafa inni aiqamausaki mariani.

**Fúka Moodaanaki Kira Ufa Afaqínaasa Ufa**  
**Portions of the Holy Bible in the Binumarien**  
**language of Papua New Guinea**  
**Buk Baibel long tokples Binumarien long Niugini**

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

---

PDF generated using Haiola and XeLaTeX on 21 Feb 2024 from source files dated 31 Aug 2023

4a891130-f25d-5e30-a81c-882b2e037698